

Hordaland fylkeskommune

30 APR 2014



HORDALAND FYLKESKOMMUNE

Kontrakt

Kontrakten gjeld: Teknisk rådgjeving og bistand i vidare utbygging av infrastruktur for elbilar i Hordaland, kontakt med samarbeidspartnarar, grunneigarar og leverandørar.

Kontrakt mellom:

Hordaland fylkeskommune
(heretter kalla oppdragsgjevar)

og

Ardeo Technology AS
(heretter kalla leverandør)

For oppdragsgjevaren:
Bergen 10.04.14

Gudrun Mathisen
Klima- og naturressurssjef

For leverandøren:
Bergen 10.04.14

Eric Wheatley
Dagleg leiar

Det er skriven ut to eksemplar av denne kontrakten. Oppdragsgjevar og Leverandør har kvar motteke eitt eksemplar.

GENERELT

Kontrakten er dette avtaledokumentet og dei Alminnelege innkjøpsvilkår for tenester.

FORMÅLET MED KONTRAKTEN

Kontrakten skal dekkje det oppdragsgjevaren treng av tenester som omtalt i førespurnaden.

Formålet med kontrakten er å regulere rettar og plikter til partane i samband med kjøp av tenestene.

AVTALEN GJELD I TIDSRUMMET

Avtalen gjeld 01.04.14 til 31.03.15 med moglegheit for forlenging i 1+1+1 år.

OMFANG

Leveransen skal vere i samsvar med kontrakten og

Vedlegg 1: Oppdragsgjevar sin kravspesifikasjon i førespurnaden

Vedlegg 2: Leverandør sitt tilbod

Dokumenta er lista opp i prioritert rekkefølge.

PRIS- OG BETALINGSVILKÅR

Det er avtalt følgjande prisar for oppdraget:

NOK 850 per time ekskl. MVA

Leverandør skal fakturere fortløpande månadleg.

KONTAKTPERSONAR

Oppdragsgjevar sin kontaktperson for kontrakten er:

Namn:	Einar Aalen Hunsager
e-post:	Einar.aalen.hunsager@hfk.no
Telefon:	55239322
Postadresse:	Postboks 7900, 5020 Bergen

Leverandør sin kontaktperson for kontrakten er:

Namn:	Eric Wheatley
e-post:	sew@ardeo-tech.no
Telefon:	55138944
Postadresse:	Osvegen 210 5229 Kalandseidet



FAKTURERING

HFK har innført eit elektronisk fakturasystem. Leverandøren skal levere elektronisk faktura. Leverandøren skal sende elektronisk faktura via meldingsformidlar/aksesspunkt. For generell info om elektronisk faktura, sjå www.anskaffelser.no/e-handel/faktura/om-elektronisk-faktura.

Kontaktperson for etablering av elektronisk faktura er:
Helge Flatebø, e-post: helge.johan.flatebo@hfk.no
Telefon: 55239038

Nærare informasjon om elektronisk faktura

Format: E2B eller EHF. Vi ønsker IKKJE faktura som vedlegg til E-post (PDF).

Sending via meldingsformidlar/aksesspunkt	Sending via banknett
HORDALAND FYLKESKOMMUNE	HORDALAND FYLKESKOMMUNE
Efakturaadresse NO938626367	EfakturaId DNBANOKKNEX-NO6715021036460
Feltbeskrivelse XML /InvoiceHeader/Buyer inneholde LocationId: <LocationId> NO938626367 </LocationId>	

1. Når du skal sende første reelle efaktura, vennleg informer din kontaktperson hos Hordaland fylkeskommune først.

Kontaktperson: Helge Flatebø, tlf 55239038

e-post: helge.johan.flatebo@hfk.no

2. Hordaland fylkeskommune nyttar **ressursnummer**/kundes referanse for automatisk flyt av dine fakturaer til riktig mottakar. Det er derfor viktig at du inkluderer ressursnummer på fakturaen om dette er tilgjengeleg.

Kundes referanse Ressursnummer 160187	/ Interchange / Invoice / InvoiceHeader / Buyer / Ref[Code='BuyerReference'] / Text
Ressursnr. Skal leggjast i feltet: →	Eksempel: <Code>BuyerReference</Code> <Text> 160187 </Text>
Alternativt kan det leggjast i: →	< ContactPerson> <Name> 160187 </Name>

For at fakturaen skal komme raskt frem til riktig mottakar internt i Hordaland Fylkeskommune er det viktig at ressursnummer **160187** er opplyst på fakturaen.

Ved avvik mellom ordrebeløp og mottatt faktura, skal oppdragsgjevar varsle leverandøren om avviket innan betalingsfristen for faktura. Leverandøren skal utan ugrunna opphald rette opp avviket og sende kreditnota til oppdragjevaren.

Alminnelege innkjøpsvilkår for tenester

1 Bruk

- 1.1 Disse alminnelege innkjøpsvilkåra gjeld for kjøp av tenester til Hordaland fylkeskommune.
- 1.2 Leverandøren er den adressaten som bestillinga er stila til og/eller det er inngått avtale med.
- 1.3 Eventuelle avvikande kontrakts-/leveringsvilkår er utan verknad for leveransen med mindre oppdragsgjevaren skriftleg har godteke dei.
- 1.4 Dei alminnelege føresegnene i lov om kjøp av 13. mai 1988 nr. 27 (kjøpslova) gjeld så langt anna ikkje er avtalt.

2 Pris og betalingsvilkår

- 2.1 Prisen skal vere avtalt på førehand mellom partane. Prisen inkluderer alle kostnader. Prisen skal vere avtalt eksklusive meirverdiavgift.
- 2.2 Fakturering skal skje etterskotsvis med betaling per 30 dagar. Betalingsfristen startar ikkje å løpa før levering har skjedd og godkjend faktura er motteken.
- 2.3 Godkjend faktura skal vere spesifisert slik at oppdragsgjevaren kan kontrollere at det som er fakturert, er levert i samsvar med kontrakten. Det blir ikkje akseptert fakturagebyr, purregebyr eller andre gebyr. For fakturering etter tidsbruk skal tidsbruken spesifiserast.
- 2.4 Ved forseinka betaling kan leverandøren krevje forseinkingsrenter i samsvar med lov 17. desember 1976 nr. 100 om renter ved forsinket betaling mv.
- 2.5 Leverandøren kan ikkje overdra fakturaer til tredjemann for innkrevjing utan samtykke frå oppdragsgjevaren på førehand.

3 Levering

- 3.1 Levering blir rekna som utført når tenesteytinga er gjennomført i samsvar med det som er avtalt, og oppdragsgjevaren har godkjent leveransen.
- 3.2 Dersom tenesteytinga består av utgreiings- eller utviklingsoppdrag, reknar ein leveringa som utført først når aktuelle dokument o.l. er overleverte, og oppdragsgjevaren har godkjent dei.

4 Risikoovergang

Risikoen går over frå leverandøren til oppdragsgjevaren ved levering.

5 Leverandøren sine kontraktplikter

- 5.1 Alminnelege plikter
 - 5.1.1 Tenesteytinga skal gjennomførast etter avtalen og skal utførast profesjonelt, effektivt og med høg fagleg standard.
 - 5.1.2 Leverandøren skal samarbeide lojalt med oppdragsgjevaren og ivareta oppdragsgjevaren sine interesser.
- 5.2 Tenesteytinga sine eigenskapar
 - 5.2.1 Leverandøren skal utføre tenesteytingar i samsvar med kontrakten. Tenesteytinga skal elles vere eigna for det tiltenkte formålet.
 - 5.2.2 Leverandøren er ansvarleg for at utføringa av tenesteytinga skjer i samsvar med gjeldande lovgiving og i samsvar med relevant bransjeregulering og eventuelle andre reglar som kan ha innverknad på utføringa av tenesteytinga. Leverandøren skal innhente og vidareføre alle nødvendige løyve for utføring av tenesteytingar og på oppmoding frå oppdragsgjevaren leggje fram dokumentasjon på at nødvendige løyve finst.

5.3 Garanti

- 5.3.1 Leverandøren tek på seg ansvar for feil og manglar som måtte bli påviste i dei første 24 månadene etter levering. For deloppdrag reknar ein fristen frå heile tenesteytinga er levert. Garantitida skal likevel ikkje vere kortare enn alminneleg praksis for den aktuelle bransjen. Leverandøren skal i garantitida snarast råd og for eiga rekning rette feil og manglar

- 5.3.2 ved leveransen, slik at han er utan feil og manglar av noko slag.
Føresegna her avgrensar ikkje retten oppdragsgjevaren har til å fremje alminnelege mangelsanksjonar.

5.4 Overføring av rettar, rettsmanglar

- 5.4.1 Eigedommsrett, opphavsrett og andre relevante materielle og immaterielle rettar til tenesteytinga tilkjem oppdragsgjevaren når betaling har skjedd, med mindre anna er skriftleg avtalt, og med dei avgrensingar som følgjer av annan avtale eller ufråvikeleg lov.
- 5.4.2 Leverandøren skal levere varene frie for tredjemannskrav som ikkje er omtalte i avtalen, og skal halde oppdragsgjevaren skadefri for alle former for tredjemannskrav.
- 5.4.3 Leverandøren har rettane til eigne verktøy og metodegrunnlag. Begge partane kan òg utnytte generell kunnskap (*knowhow*) som ikkje er underlagt teieplikt, og som dei har tileigna seg i samband med tenesteytinga.

5.5 Overføring av dokument

Der tenesteytinga er representert ved dokument, skal desse dokumenta leverast saman med tenesteytinga.

5.6 Underleverandørar

Med mindre anna er avtalt mellom partane, kan leverandøren nytte underleverandørar til å oppfylle pliktene sine etter kontrakten. Leverandøren er likevel ansvarleg for å oppfylle heile leveransen. Oppdragsgjevaren har rett til å underkjenne valet av underleverandør dersom det er sakleg grunn til det.

5.7 Forsikringar

Leverandør har ansvar for aktuelle forsikringar fram til risikoen går over på oppdragsgjevaren.

5.8 Varslingsplikt

Blir leverandøren hindra i å oppfylle pliktene sine til rett tid, skal han utan ugrunna opphald melde frå til oppdragsgjevaren om hindringa og kva følgjer det får. Leverandøren skal kunne dokumentere når og korleis slik melding blei gjeven.

6 Oppdragsgjevaren sine sanksjonar ved mislighald

6.1 Reklamasjonsperiode

- 6.1.1 Dersom oppdragsgjevaren ønskjer å gjere gjeldande mislighaldsverknader, må han gi skriftleg melding til leverandøren om mangelen innan rimeleg tid etter at han oppdaga eller burde ha oppdaga han.
- 6.1.2 Reklamerer ikkje oppdragsgjevaren innan tre – 3 – år etter levering, kan han ikkje seinare gjere mangelen gjeldande. Det gjeld ikkje dersom leverandøren ved garanti eller annan avtale har teke på seg ansvar for manglar i lengre tid.
- 6.1.3 Oppdragsgjevaren kan uansett gjere mangelen gjeldande dersom leverandøren har opptreidd forsettleg, grovt aktaust eller i strid med ærleg framferd og god tru.

6.2 Brot på varslingsplikta

Dersom oppdragsgjevaren ikkje får slikt varsel som bestemt i pkt. 5.8 innan rimeleg tid etter at leverandøren fekk eller burde ha fått kjennskap til hindringa, kan han krevje erstatta tap som kunne vore unngått om han hadde fått meldinga i tide.

6.3 Tilbakehalding av betaling



Har oppdragsgjeveren krav som følge av misleghald frå leverandørens side, kan han halde tilbake så mykje av vederlaget som misleghaldet utgjør av det samla vederlaget.

6.4 Dagbot

- 6.4.1 Dersom leverandøren ikkje held fristar som avtalt, ligg det føre forseinking, som gir grunnlag for dagbot. Ved forseinking begynner dagbot å gå automatisk.
- 6.4.2 Dagbota utgjør 1 prosent av vederlaget for den delen av leveransen som blir påverka av forseinkinga, per kvardag forseinkinga varer, avgrensa til tjue – 20 – kvardagar. Dagbota utgjør uansett minimum 1000 kroner per kvardag.
- 6.4.3 Så lenge dagbota går, kan oppdragsgjeveren ikkje heve avtalen. Det gjeld ikkje dersom leverandøren eller nokon han svarer for, har opptredd forsettleg, grovt aktaust eller i strid med ærleg framferd og god tru.
- 6.4.4 Dersom dagbota ikkje dekkjer oppdragsgjeverens dokumenterte direkte tap som følge av forseinkinga, kan oppdragsgjeveren søkje erstatning for det overskytande beløpet.

6.5 Dekningskjøp ved heving

Ved heving har oppdragsgjeveren rett til å gjennomføre dekningskjøp på rimeleg måte og innan rimeleg tid etter hevinga. Oppdragsgjeveren har ved krav om erstatning rett på differansen mellom kontraktsprisen og prisen på dekningstransaksjonen.

6.6 Andre sanksjonar ved misleghald

Andre sanksjonar ved misleghald følgjer av dei alminnelege reglane i lov om kjøp av 13. mai 1988 nr. 27 (kjøpslova).

7 Oppdragsgjeveren sine kontraktplikter

7.1 Generelle plikter

Oppdragsgjeveren skal lojalt medverke til at kontrakten blir gjennomført.

7.2 Varslingsplikt

Blir oppdragsgjeveren hindra i å oppfylle pliktene sine til rett tid, skal han utan ugrunna opphald gi melding til leverandøren om hindringa og kva følgjer det får. Oppdragsgjeveren skal kunne dokumentere når og korleis slik melding blei gitt.

8 Leverandøren sine sanksjonar ved misleghald

8.1 Brot på varslingsplikta

Dersom leverandøren ikkje får slikt varsel som bestemt i pkt. 7.2 innan rimeleg tid etter at oppdragsgjeveren fekk eller burde ha fått kjennskap til hindringa, kan han krevje erstatta tap som kunne vore unngått om han hadde fått meldinga i tide.

8.2 Leverandøren sin tilbakehaldsrett

Leverandøren kan ikkje halde tilbake ytingar som følgjer av misleghald frå oppdragsgjeveren si side. Dette gjeld likevel ikkje dersom misleghaldet er vesentleg.

8.3 Andre misleghaldsverknader

Andre misleghaldsverknader følgjer av dei alminnelege reglane i lov om kjøp av 13. mai 1988 nr. 27 (kjøpslova).

9 Fritak frå kontraktplikter (force majeure)

- 9.1 Partane kan få fritak frå sine kontraktplikter etter denne kontrakten i tilfelle der det inntreff hindring utanfor partane sin kontroll som ein ikkje med rimeleg skjønn kunne vente at han skulle ha teke omsyn til på avtaletida, eller skulle ha unngått eller ha overvunne følgjene av i relasjon til oppfyltinga av ein eller fleire kontraktplikter.
- 9.2 Fritak frå kontraktplikter set som vilkår at den råka parten utan ugrunna opphald gir den andre parten melding om hindringa, og at pliktene difor ikkje gjeld.

- 9.3 Fritaket frå kontraktplikter for den råka parten gjeld så lenge den ekstraordinære situasjonen varer.

10 Overføring av rettar og plikter

Overføring av kontrakten – eller delar av han – kan berre finne stad etter skriftleg samtykke frå oppdragsgjeveren. Dersom leverandøren fusjonerer eller fisjonerer, har oppdragsgjeveren rett til å heve kontrakten med det same.

11 Endring, stansing og avbestilling

- 11.1 Dersom oppdragsgjeveren etter at kontrakten er inngått, har behov for å endre krava til yting eller andre føresetnader for avtalen på ein slik måte at tenesteytingas karakter eller omfang blir annleis enn avtalt, kan oppdragsgjeveren be om endringsavtale.

Ved krav om endringar kan leverandøren krevje justeringar i vederlag eller tidsplanar dersom han sannsynleggjer eit grunnlag for slike justeringar. Krav om justert vederlag eller tidsplan må setjast fram seinast samtidig med at leverandøren svarer på oppmodinga frå kjøparen om endringsavtale.

Oppdragsgjeveren kan krevje at tenesteytinga blir redusert eller auka inntil tilsvarende 20 prosent av vederlaget for heile tenesteytinga. Prisen skal i så fall endrast i tråd med reduksjonen eller auken. Leverandøren kan ikkje krevje kompensasjon for slik eventuell reduksjon.

Er partane ueinige om beløpet som skal leggjast til eller trekkjast frå vederlaget, eller andre konsekvensar som følgjer av endringa, skal leverandøren likevel setje i verk endringa utan å vente på endeleg løysing av tvisten.

- 11.2 Oppdragsgjeveren kan krevje at gjennomføringa av tenesteytinga blir stansa mellombels. Kravet skal setjast fram skriftleg. Det skal opplysast når tenesteytinga skal stansast, og når ho er planlagt teken opp att.

Ved mellombels stans skal oppdragsgjeveren erstatte følgjande:

- Leverandørens dokumenterte kostnader knytte til omdisponering av personell
- Andre direkte kostnader som leverandøren blir påført som følgje av stansinga

- 11.3 Oppdragsgjeveren kan avbestille tenesteytinga med tretti – 30 – dagars skriftleg varsel. Reduksjon av tenesteytinga på inntil 20 prosent av vederlaget for heile tenesteytinga blir rekna som endring og ikkje avbestilling.

Ved avbestilling før tenesteytinga er fullført, skal oppdragsgjeveren betale følgjande:

- Det beløpet leverandøren har til gode for allereie utført arbeid
- Leverandørens dokumenterte kostnader knytte til omdisponering av personell
- Andre direkte kostnader som leverandøren blir påført som følgje av avbestillinga

12 Reklame

Leverandøren må innhente førehandsgodkjenning frå oppdragsgjeveren dersom han for reklameformål eller på annan måte ønskjer å gi offentlegheita informasjon om kontrakten ut over å oppgje leveransen som generell referanse.

13 Tvistar

Dersom det oppstår tvist om tolkingar eller rettsverknad av vilkåra, skal det søkjast løyst ved forhandlingar. Fører forhandlingane ikkje fram innan avtalt tid, seinast innan fire veker etter det første forhandlingsmøtet, skal dei ordinære domstolane avgjere tvisten. Rettskretsen til oppdragsgjeveren er verneting. Tvistar som gjeld kontraktsinngåing, -oppfylting og/eller -tolking, skal avgjerast etter norsk rett.

